

欽定全唐文

欽定全唐文卷七百七十一目錄

新文藝出版社藏書

李商隱

一

蠭賦

爲彭陽公興元請尋醫表

代彭陽公遺表

爲安平公謝除兗海觀察使表

爲安平公兗州謝上表

代安平公華州賀聖躬痊復表

代安平公遺表

爲汝南公華州賀赦表

爲汝南公以妖星見賀德音表

爲汝南公賀彗星不見表

爲汝南公賀元日御正殿受朝賀表

爲京兆公陝州賀南郊赦表

爲濮陽公陳許謝上表

爲濮陽公陳情表

爲濮陽公論皇太子表

爲尚書濮陽公涇原讓加兵部尚書表

爲濮陽公奉慰皇太子薨表

代僕射濮陽公遺表

欽定全唐文卷七百七十一

李商隱

一

商隱字義山懷州河內人少爲令狐楚巡官開成二年登進士第會昌二年又以書判拔萃王茂元鎮河陽辟掌書記爲侍御史久不調會鄭亞廉察桂州請爲觀察判官大中初亞貶循州商隱隨赴嶺表三年入爲京兆尹盧宏正據曹又從爲掌書記補太學博士柳仲郢鎮東蜀辟爲節度判官檢校工部郎中大中末卒

蟲賦

亦氣而孕亦卵而成晨鳬露鵠不知其生汝職惟鬻而不
善鬻同臭而多跖香而絕

蝎賦

夜風索索緣隙憑壁弗聲弗鳴潛此毒螯厥虎不翅厥牛
不齒爾兮何功旣角而尾

爲彭陽公興元請彝醫表

臣某言臣聞長育之功允歸於天地疾痛所迫必告於君
親是以今月某日竊獻表章上千旒辰備陳舊恙當此頽
齡乞解藩維一歸京輦衰羸則甚戰灼猶深臣某中謝臣

早以庸虛久塵恩渥四朝受任二紀叨榮華省黃樞皆驚
竊位專征處守每愧非才豈不願竭蠻蟻之微生盡桑榆
之暮景靡敢言病罔或告勞然事有不可因循力有不堪
勉疆苟懷情不盡則事主非忠且漢上雄藩褒中重鎮統
臨至廣控壓非輕以臣昔年尚憂不理在臣今日其何敢
安亦旣揣量豈容緘默固合卽時離鎮隨表歸朝伏料睿
慈必從丹款拜魏闕而獲伸積戀訪秦醫而冀愈沉疴乏
絕之時馳驅未晚臣已決取今月某日離本道東上無任
祈恩危迫之至

代彭陽公遺表

臣某言臣聞達士格言以生爲逆旅古者垂訓謂死爲歸人苟得其終何恤于化臣永惟際會獲遇昇平鐘鼎之勲莫彰風露之姿先盡雖無逃大數亦有負清朝今則舉纊陳詞對棺忍死白日無分元夜何長淚兼血垂目與魂斷臣某中謝臣早緣儒學得廁人曹克紹家聲不虧士行詞賦貢名于宗伯書檄應聘于諸侯東汎西浮南登北走時推倚馬人或薦雄西掖承榮得以言之無罪曲臺備位麤明物有其容永謂才難便叨郎選振衣華省厯履名曹高

步內庭光揚密命憲宗皇帝以臣行多餘力忠絕它腸進
無所因靜以有立過蒙顧問深降褒稱乃于同列之中獨
許非常之拜殊恩既浹當路相排旅翩未高孤根已動河
潼爲郡盟津統師溺以待援疲而念起憲宗旁求輔相卽
記姓名果遣急徵仍加大用戴君之力雖弱許國之誠在
茲實有微衷可裨元化况初誅背叛務活疲羸方伏奏于
鳳宸之前忽庇徒于鳥耘之次小吏抵罪邪臣結謀指之
有名黑不得訴空甘罪戾仰托聖明麤得生還幾臨死所
其後官移督護四年不謁于承華任改察廉一日蹔留于

分陗欲舉而墜將安更危賴敬宗皇帝續乃不圖是思求
舊振于洛宅榮彼夷門自茲以來敢虛其遇周旋五紀鎮
守惟切分憂前後兩歸闕庭皆非久次拙直不同于衆讒
毀每集其躬含意未宣救過不暇伏思自長慶厥後開成
之前凡幾忝遷昇幾遭退斥若非不欺天地不負君親至
於幾微尋令顛隕伏惟皇帝陛下道超覆載仁極照臨既
委鹽鐵又分端揆逮今控壓亦在重鎮陛下之恩微臣何
益微臣之節陛下方知興言及斯碎首殊晚然臣從心之
年已至致政之禮宜遵尋欲拜章以求歸老伏以諸道節

制頻歲更移其于送迎例多積累臣在此雖無一毫侵損亦無纖介誅求帑藏甚殷倉儲可羨特緣行李忍過秋冬而江山之氣候難常蒲柳之蕭衰易見自夏則膝脰無力入冬則腸胃不調對冠冕而始訝儻來指墓墳而已知息處今月八日臣已召男國子博士緒左補闕絢左武衛兵曹叅軍綸等示以歿期遺之理命使內則雍和私室外則竭盡公家兼約其送終務遵儉約勿為從容以致慮居至十二日夜有僕夫告臣云大星隕地雅當正室洞照一庭臣卽端坐俟時正辭無撓臣之年亦極矣臣之榮亦足矣

以祖以父皆蒙褒寵有弟有子並列班行全腰領以從前人歸體魄以事先帝此不自達誠爲甚愚但以將掩泉局不得重辭雲陛更陳尸諫猶進瞽言雖叫呼而不能豈誠明之敢忘伏惟皇帝陛下春秋鼎盛華夏鏡清是修教化之初當復理安之始然自前年夏秋以來貶謫者至多誅僇者不少伏望普加鴻造稍霽皇威歿者昭雪以雲雷存者沾濡以雨露使五稼嘉熟兆人樂康用臣將盡之苦言慰臣永蟄之幽魄臣某云云臣當道兵馬已差監軍使竇千乘勾當其節度留務差行軍司馬趙祝觀察留務差節

度判官杜勝訖有舊規模無新革易悉當輯睦決無誼驚
臣心雖澄定氣已危促辭多逾切鳴急更哀升屋而三號
豈來赴壑而一去無返忠誠直道竟埋沒于外藩腐骨枯
骸空歸全于故國迴望昭代無任攀戀永訣之至謹奉表
代辭以聞臣某誠號誠咽頓首頓首

爲安平公謝除充海觀察使表

臣某言今月某日中使王士岌至奉宣恩旨改授臣某官
并賜臣前件告身一通者寵命天臨恩光春煦兢惶無措
朴蹈失容臣某中謝臣幸逢昭代本自諸生文以飾身學

實爲已寧韞玉而待賈竊運甓以私勞春闌再中于明經
天官一昇於判第階級甚薄際會則多芸閣讐書藍田作
吏中間因依知已契濶從軍其後超屬憲司驟登郎署埋
輪而出高懸八使之威起草以居遠謝三臺之妙每含香
而自歎常襍被而待行伏惟皇帝陛下鈞陶庶彙亭毒萬
方憂心同堯好諫若禹東披垣內封章何有于日聞青瑣
門前列位徒參于夕拜擺波濤而鯢鱗纔變望烟霄而鸞
翮初高誓將竭誠非敢養望然虛受難處忝據非安忽擁
隼旗竟辭龍闕猶賴雲日未遠關城不遙虔奉國章麤免

官謗豈意便升亞相之班秩復委大藩之廉問魚箋帝語
象軸神工拜受而若捧千鈞伏讀而如聽九奏誠雖深于
負荷戀實切于違離况曲阜遺封導河舊壤列九州之數
帶五岳之雄古爲詩書俎豆之鄉今兼魚鹽兵革之地訓
整合資于武幹撫循宜屬于柔良豈伊辱微堪此委寄謹
當冰霜勵志金石貫誠駕馬奮十駕之勤鉛刀淬一割之
用卽以今月二日雪泣西拜星馳東下帝城思入雖有類
于陳咸關外耻居安敢同于楊僕無任瞻天戀闕之至謹
附中使某奉表陳謝以聞

爲安平公兗州謝上表

臣某言臣自承明詔移鎮東藩望闕而雪涕以辭戒途而
星奔不息卽以今月五日到任上訖當時集軍州官吏等
宣布皇風闡揚元造歡聲雷動喜氣雲高臣某中謝臣本
由儒業獲廁朝榮粵自烏臺至于青瑣累更近地皆奉休
期用盡心以書紳長憂福過取知足而銘座敢倣時來旋
屬皇帝陛下垂意關城推心甸服俾之防遏兼使緝綏橫
被天波未移星琯豈期非次忽致殊遷察俗雄藩分榮大
憲地濱河濟山奄龜蒙本孔里周封有堯祠舜澤九州之

名數甚古三代之禮樂舊傳退省何人合安茲地撫躬而
浹背汗下仰恩而溢背淚流况所部驍雄素兼節制爲於
當代便屬文臣畫武聚螢昔惟久事筆硯佩鞬帶鶻今寧
能執干戈幸臣前在華州日虔奉詔條克宣戎律檢下而
羊無九牧馭黠而犬用左牽用令去任之時大有遮留之
請盡三屬縣至萬餘人不放卽途皆來卧轍竟稽朝發遂
致宵奔請于茲時亦因前政冀漸令蘇息長使謐寧然後
遠訪云亭高尋日觀備萬乘登封之所設諸侯朝宿之儀
盛禮獲窺微願斯畢過此以往不知所圖無任戴恩隕越

之至謹差某官某奉表陳謝以聞

代安平公華州賀聖躬痊復表

臣某言今月某日得本道進奏院報以聖躬痊和右僕射
平章事臣涯等奉見聖躬訖社稷殊祥生靈大慶臣忝分
朝寄四奉國恩無任抃舞踴躍之至臣聞天普覆也應運
而健若龍行日至明焉有時而氣如虹貫伏惟皇帝陛下
道超普覆迹邁至明思社稷之靈惟德是輔念蒸黎之廣
以位爲憂求衣未明觀書乙夜壽域旣臻於躋俗大庭微
關於怡神是以自北陸送寒颸停禹會及東郊迎氣爰復

堯咨四海方來百辟減在六幽雷動萬壽山呼惟臣獨以
一麾載離雙闕犬馬之微誠徒切鵠鴻之舊列難階提郡
印而通宵九驚對使符而一食三起今幸已俗臻殷富年
比順成伏惟稍簡萬幾以迎百福託調燮于彼相責綏撫
于列藩承九廟之降祥副兆人之允望臣某不勝悽悽慊
慊之至謹差某奉表陳賀以聞

代安平公遺表

臣某言臣聞風葉露華榮落之姿何定夏朝冬日短長之
數難移臣幸屬昌期謬登貴仕行年五十五歷官二十三

念犬馬之常期死亦非天奈君親之厚施生以無酬是以
時及含珠命餘屬續心猶向闕手尚封章撫躬而氣息奄
然戀主而方寸亂矣臣某中謝臣少而羈縛長乃遭逢常
將直道而行實以明經入仕王畿作吏非州府之職徒勞
侯國從知媿軍旅之事未學憲宗皇帝謂臣剛決擢以憲
司穆宗皇帝謂臣才能登之郎選忝霜威而無所擢拉厯
星紀而有紊次躋旋屬皇帝陛下大明御宇至道承乾澄
汰之初臣不居有過超擢之際臣獨出常倫高選掖垣箴
規未效入居瑣闈論駁無聞自去年秋來典河關兼臨甸

服惟當靜而阜俗清以繩姦鬻致豐穰幸逃逋責豈意陞
下謂臣奄有三縣未稱其能謂臣出以一麾未足爲貴爰
降綸綺移之藩方錫以海隅與之岳鎮將吾君之驤果萬
計使得總齊聯吾君之牧伯三人以居巡屬時雖相羨臣
實深憂旣屬聖恩果遭鬼瞰况臣素無微恙未及大年方
思高掛餽魚不然官燭成陛下降比屋可封之化分陛下一
夫不獲之憂志願未伸大期俄迫忽至今月十日夜暴染
霍亂并兩肋氣注當時檢驗方書煎和藥物百計療理一
無痊除至十一日辰時轉加困劇漸不支持想彼孤魂已

游岱岳念茲二豎徒訪秦醫對印執符碎心殞首人之到此命也如何戀深而乏力以言泣盡而無血可繼臣某誠哀誠戀頓首頓首臣當道三軍將士準前使李文悅例差監軍使元順通勾當訖臣與順通近同王事備見公才假之統臨必能和協其團練觀察兩使事差都團練巡官盧涇勾當訖臣亦授之方畧示以規模伏惟聖明不致憂軫臣精神危促言詞失錯行當窮塵埋骨枯木容身螻蟻卜隣烏鵲食祭黃河兩曲長安幾千生入舊關望絕班超之請力封遺奏痛深來歛之辭迴望昭代不勝荒憇眷戀之

至謹差某奉表代辭以聞

爲汝南公華州賀赦表

臣某言伏奉正月九日制書南郊禮畢改元爲某大赦天下者奉郊禋以定天位新厯象以授人時乾健離明震動兌悅跂行喙息罔不慶幸臣某中賀臣聞禋昊天而旅上帝者聖王之重事覃殊休而發大號者哲后之宏猷故必致四圭以達誠制六器而伸敬將崇嚴配必在元旬先之以蒼璧駢牲重之以雲門大呂然後王猶有關於薦敬爽彼告虔周官三代之文絕而不續漢氏萬靈之位失而莫

尋豈若皇帝陛下以大道遂羣生以至公臨寶祚上苞元
象下總皇祇默幽陟明興廢繼絕靈芝甘露鄙之而不告
史官赤雁白麟陋之而不編瑞牒然後因孟月卜上辛率
于國南式是歲首且天以陛下爲子故必饗明誠人以陛
下爲天故必流睿澤踰千越萬邁五登三何則取直言之
科則聽輿論者不足算設宥過之令則除鄉議者未可儻
延賞推恩用以勸禦災捍患之士減租退責將以矜火耕
水耨之人養庶老頒淖糜暖帛之資走羣望潔剗牲瘞幣
之禮古不覩者復覩古不聞者復聞萬蟄蘇而六幽盡開

五刃藏而九土咸闢臣當時集軍州官吏等丁寧告示訖
况臣嘗備論思獲叨侍從當時仙禁慙視草以無能此日
泰壇望給薪而靡及徘徊甸服跼蹐關城雖有慶于文明
竟無階于奔走司馬談闋陪盛禮沒齒難忘蕭望之願立
本朝馳魂莫及無任抃舞結戀之至

爲汝南公以妖星見賀德音表

臣某言臣伏奉某月日德音以妖星謫見思答天戒者臣
當時集軍州官吏丁寧宣示訖仁深覆載恩極照臨究祖
宗之令圖極皇王之盛事圓首方足罔不欣慶臣某中賀

臣聞覆載莫大於天地而升降之氣或不接照臨莫大于日月而薄蝕之度或有差豈惟休咎之徵自是陰陽之事旋觀彗孛載考策書雖欲爲災曷嘗勝德伏惟皇帝陛下荆枝載茂棣萼重輝旣居正以體元亦觀文而察變仰觀星彩稍越天常於是深軫皇情重迴宸眷省躬之懼洞感于幽明及物之恩畢沾于華夏戒田游則成湯祝網之意釋寃滯乃大禹泣辜之慈罷去修營惜漢氏十家之產勸課耘耔復周邦九歲之儲德已厚矣仁已極矣然猶避寢自責撤膳貽憂以此延休何休不至以茲備患何患能爲

足以高步三王平窺百古鞭撻守成之主秕穠中代之君
抑臣又聞之昔貞觀之理也太宗文皇帝吞蝗而災沴息
泰山之封也元宗明皇帝露坐而風雨消炯戒猶存神靈
未遠陛下永懷貽厥有切欽承爲其所不爲至其所不至
佇見地泉流醴天酒凝甘人知朱草之祥家識白麟之瑞
又豈芒角足懼晷度可憂者哉臣素乏器能謬當任使東
雍西岳雖首化于百城日遠天高但心存于雙闕聽金石
而慙殊舞獸無羽翼而恨異冥鴻惟當虔奉詔條頒宣德
澤成陛下無偏之道畢微臣盡瘁之勤所冀不寘簡書免

拘司敗如其禮樂非臣所能無任感恩戀闕懇惓屏營之至

爲汝南公賀彗星不見表

臣某言得本州進奏院狀報今月某日夜彗星不見宰臣某等奉表稱賀請御正殿復常膳者天道甚密聖心不遐感極而災亦爲祥誠至而妖寧勝德臣某中賀臣聞殷湯以六事責躬止七年之旱宋景以一言修德退三舍之星歷代以來咎徵常有苟君能克己則禍不移人伏惟皇帝陛下寅奉丕圖恭臨大寶遵符列聖酌憲前王昨者天象

之間星文稍異載深歸咎爰用覃恩倉箱畢復于九年羅
網並開其三面去營繕絕蕩心之巧申冤結除滅耳之俘
而又正殿不居大庖盡減精誠昭達懇惻敷聞芒焰遽銷
晷度如舊况蕞爾戎羯正犯疆場載思星見之徵恐是虜
亡之兆伏惟稍寬聖慮以擁皇休遵九廟之降祥副兆人
之欽屬臣又聞皇王之事天也雖至理之時不遺於憂畏
雖至和之氣不忘于將迎是故神農焦勞軒帝顛悴堯旣
癯瘠舜亦胼胝此四主側身于昔時陛下用心于今日干
載符契萬方懷柔臣常忝內朝今居近甸拱辰不及空瞻

北極之尊就日無因忽覺長安之遠惟知忭蹈莫可奮飛
况時及初正禮當元會華夷畢至玉帛皆陳小國行人外
藩下士皆得入趨鳳闕仰望獸樽臣獨限關河坐縈符竹
戀旣深而詞懇慶已極而涕零無任感恩賀聖鬱戀屏營
之至

爲汝南公賀元日御正殿受朝賀表

臣某言臣得本州進奏院狀報稱元日皇帝陛下御含元
殿受朝賀者上正三辰下臨萬國事雖舉舊命則維新臣
某中賀臣聞聖祖垂訓王者處域中之尊公羊紀時春者

爲一歲之始載稽故實抑有典章近歲以來此禮多闕或
事因惜費或時屬告休伏惟皇帝陛下道被無垠政敷有
截全取發生之德無非訴合之仁蒼昊降符黃輿告瑞石
碑旣見文作太平銀甕旋臻字成萬歲而又憂勤不輟刻
責方深精誠旁達于八紘懇惻上通于九廟仙厨撤味獸
館休畋遂使化妖宿爲壽星變小饑爲酺飲慶由聖感令
屬神行爰在新正式修闢典形庭列位丹陛陳儀疑旒而
天啟其門服袞而日昇於觀巽風發越解澤滂沱左右賢
臣駿奔多士國無訛佞擢靈草而不搖朝絕姦邪儼神羊

而莫動禮成而退物有其容足以光耀瑤圖丹青玉版耀
前映後邁五登三臣竊訪碩儒遠徵舊典帝堯華封之祝
惟止匹夫神禹塗山之義且非元會然猶堯有多憂之戒
禹存後至之誅在和平而尚乖孰歡呼之可致豈與茲日
而得同年臣方守河潼正分符竹不獲躬承玉帛首率梯
航況又嘗以藝文叨居禁密雖遠離天上猶近關西忭賀
空深就望無所心馳紫闈非夢寐而不通魂繞皇闈羨歸
飛而莫及無任荷恩祝壽戀闕屏營之至

爲京兆公陝州賀南郊赦表

臣某言臣伏奉正月九日制書郊禋禮畢改元爲某大赦
天下者既事虞郊復新堯歷天潢瀉潤日觀揚輝普天率
土罔不慶幸臣某中賀臣聞君人之孝莫大於尊祖王者
之敬孰踰于事天故必用因高之儀伸嚴配之禮百神攸
序萬靈昭蘇乃可覃殊澤渙大號禮成而德備惠敷而慶
宏然而秦尚武功先祈禳之事故柴燎蕭薌未必饗漢稱
文物重神仙之道故雲門太簇未必和既不講于禮官終
致譏于儒者伏惟皇帝陛下與春生育並日照臨究三代
之質文酌百王之損益定午位卜上辛潔齋之誠先掃除

而遐達孝思之志協氣臭以升聞然後推作解之恩降惟
新之令設科以招諫諍宥過以務哀矜已責既恤于三農
錄勲無遺于十代頒粟帛而養耆老走牲幣而福山川舉
皇王之廢官盡古今之能事臣當時集軍州官吏丁寧告
示訖况臣嘗奉恩光叨居華顯當太史撰日之際猶立漢
庭及宗伯相儀之時已辭魏闕怊悵郡印徘徊使車徒深
傾藿之誠實積懸匏之歎召公邑內敢思棠樹以追蹤尹
喜宅中惟望靈符之復出臣不勝慶幸踴躍之至

爲濮陽公陳許謝上表

臣某言臣伏奉去月八日制書授臣前件官臣卽以某月
日到任上訖當時集軍州官吏僧道耆老等揄揚王化宣
布睿慈連營咸鼓于異風闔境均霑于兌澤臣某中謝臣
才謝漢飛義慙燕使獻書求試學劖邀勲大舸千艘早竊
樓船之任勝兵萬數晚兼車騎之名雖任在啟行而時當
柔遠珠崖銅柱祇務廉平麻壘艾亭莫能恢復旋屬皇帝
陛下荆枝協慶棣萼傳輝臣得先巾墨車入拜丹陛蘭臺
假號棘署參榮奉漢后之園陵獲申送往掌周王之廩庾
方切事居不謂遽董戎旃還持武節賜國旣高于七命承

家又慶于重侯維彼璧田實聯鼎邑古之近甸今也雄藩想像汝南星聚而先賢未遠經過穎上水濁而強族皆除况在昔年常鄰多壘載贍軍額深見士心貴忠孝之兩全則忠可移孝正文武之二道則武可輔文將謀將領之能必重英豪之選豈虞拔擢乃去孱微謹當阜俗而必致人和貞師而不爲兒戲使流庸自占驍悍知方任棠水籬之規臣當可復黃霸米鹽之政臣亦不遺麤勤報效之資用贖貪叨之責奉違軒鏡幾落堯蓂比園葵以自傾畫惟向日羨海槎之不繫秋則經天感激而淚血沾衣兢憂而汗

雨決背無任感恩戀闕兢惕屏營之至

爲濮陽公陳情表

臣某言臣聞事君以忠者所宜效死食君之祿者亦戒妨
賢苟非內慊私誠外憂官謗則安肯固辭武節強委信圭
拒七命賜國之榮捨萬里封侯之策必知不可安敢無言
臣某中謝臣因緣代業遭逢聖時竊嘗有志四方不掃一
室奉隨武之家事無媿陳辭纂鄧傳之門風不傷清議屬
者每憂不試深耻因媒自薦之書朝投象魏殊常之澤暮
降芸香其後契濶星霜羈離戎旅從軍王粲徒感所知草

檄陳琳亦常交辟呂元膺東周保釐之日李師道天平畔
援之時潛入其徒盈于留邸臣此時尚持白簡猶著青袍
元膺知臣傳劘諭兵本于仁信佩鞬插羽亦識孤虛俾以
發姦假之捕盜幸無容刃以及焚巢旋帶銀章俄分竹使
隼旗楚峽出以分憂熊軾鄖城忽然通貴豈意復踰五嶺
更授再麾中間叨相青宮忝司緹騎纔通閨籍又處藩條
越井朝臺備經艱險貪泉湏水益勵平生是甘馬革之言
常懼武皮之誚及聖造遠流南極許拱北辰黃犧留官胡
牀掛柱如生羽翼若出嬰羅誓以歸彼冗員處之散地俄

以朝那闕守昆壤須人一去闕庭五罹寒燠處京畿五百里之地控蕃寇數十州之多提鼓燒烽增埤濬洫雖國家遠追上策不事交爭然蛇豕難防犬羊易縱苟罷嚴徹警則負約渝盟臣自受命以來爲日斯久未嘗一日不修戰格未嘗一日不數軍備使士有鬪心人無虛額使之偵候咸亦聞知尚未能率厲驍雄揣摩鋒鏑遠收麻壘直取艾亭成大朝經武之威畢微臣報主之分可書竹帛不辱旌常蓋以久處炎荒備薰瘴毒內搖心力外耗筋骸雖馬援據鞍尚能矍鑠而班超攬鏡不覺蕭衰恐無以早就大功

久當重任自思已熟求退爲宜伏惟皇帝陛下道冠百王
功高三代照臨若日覆露如天况今國不乏人時稱多士
有才畧在臣之右齒髮少臣之年俾代處是邦遞臨斯位
以之責效誰曰不然俾前達後生皆無蔽滯由中及外得
以交相成陛下適時之方減微臣固寵之責臣不勝祈恩
懇迫之至謹差某官奉表以聞

爲濮陽公論皇太子表

臣某言今月某日得本道進奏院狀報今月六日宰臣鄭
某等率三省官屬入論皇太子事者褫魄疆塲馳魂輦轂

莫知本末伏用驚惶臣某中謝臣聞禮贊元良易標明兩
是司七鬯以奉宗祧華夏式瞻邦家大本自昔質文或異
步驟雖殊旣立之以賢則輔之有道北宮養德東序承榮
務近正人用光繼體周則周公爲太傅太公爲太師漢則
疏氏二賢商山四老內揚孝道外盡忠規猶在去彼嫌猜
辨其疑似不由微細輕致動搖乃得守三十代之丕圖延
四百年之景祚著于史冊煥若丹青伏惟皇帝陛下道冠
百王功高三古事藐化本謀洞幾先皇太子自正位春坊
傳輝望苑陛下旁延雋乂以贊溫文並學探泉源氣壓浮

競嗜魚不進求玦莫從有王褒之獻箴無卞蘭之奏賦今
縱麤乖睿旨微嫌聖心當以猶屬妙齡未加元服或攜徒
御時縱逸游樂野夏儲亦常觀舞南皮魏副屢見飛觴陛
下睿發慈仁殷勤指教稍踰規戒卽震威靈雖伐木折薪
必循其理而逝梁發笱亦有可虞抑臣又聞父之於子也
有嚴訓而無責善君之於臣也有掩惡而復錄功故得各
務日新並從夕改同寘于道不傷其慈儻犯在斯須便遺
天性過當造次遠抵國章則以古以今孰爲令子在朝在
野誰曰全臣虛牽復之微言失不貳之深旨伏惟陛下侔

覆育于天地霽赫怒于雷霆復許省勵宮闈卑謝師傅蹈
殊休于列聖慰欽矚于兆人臣才則荒涼志惟朴駢因緣
代業蒙被官榮竊諸侯之土田領大將之旗鼓當車折檻
合首他人憑膽刺心正當今日而名非朝籍務切軍機道
阻且修佇立以泣龍樓獻直戴達之詞翰莫聞鳳闕拜章
張儼之精誠未泯干冒宸極無任隕涕祈恩之至謹遣某
官某奉表陳論以聞

爲尚書濮陽公涇原讓加兵部尚書表

臣某言今月某日中使某至奉宣恩旨加授臣某官依前

充四鎮北庭行軍兼涇原等州節度營田觀察處置等使
散官勲賜如故并賜臣官誥一通者初謂風傳忽從日下
恆忪自失忭舞不能臣某中謝臣夙探史冊頗究職官尚
書則虞曰納言兵部乃周之司馬是司九法爰統六師歷
代以來非賢不處田穰苴之文武始議超居張孺子之尊
崇方宜入拜罕有以茲名器遠假藩維况臣識媿通人號
非名士芸香補吏方同班固之私循象魏獻書有異東方
之自薦因緣蔭第齒列周行乃藉時來不期官達屬者出
征海嶠再撫蠻陬獨向一隅遂踰萬里王邵伯之犧生則

還官吳隱之之魚食寧去骨麤無悔咎得及旋歸纔望京
華又分旄節擁戎馬于涇上獲田穀于同中罷講艨艟學
燒烽燧四頒堯歷一別漢庭葱嶺猶羶雪山未復拔劔而
憤鸞弧不平豈謂皇帝陛下收雲中長者之名錄義陽絕
域之志輒寬乃睠卽議酬勞借寵于總軍分榮于整武前
叨末塞後忝轉加紀在綵牋卷之瑤軸然臣退思其所內
顧其能貪天之功前經攸戒受爵不讓古人所非富哉是
言服之無斁高封大邑君親誠用以推恩銘座循墻臣心
詎忘于揣分自昔避乎全盛懼彼高明度其私誠豈徒虛

飾直恐任踰其量事過其涯則鬼亦害盈天能概滿因循
且爾顛覆隨之雖在至愚實知斯義伏惟皇帝陛下溫以
煦物歟而燭幽待乞追還使臣寢息嚴命苟臣重憑廟畧
麤振兵威少能斷臂扼吭下城徇地此而進律庸敢自媒
俟陶侃之書勲方加羽葆待班超之立績始議鼓鼙使遷
擢之有章亦望位而相稱臣某不勝志願懇迫之至謹差
押衙某官某馳奉恩告陳讓以聞

爲濮陽公奉慰皇太子薨表

臣某言今月某日得本道進奏院狀報今月某日以皇太

子奄謝東宮輟今月十三日至來月一日朝參者前星失
色少海驚波歛結一人悲纏萬國臣某誠涕誠咽頓首頓
首伏以皇太子地當守器賢可承祧金馬銅羊早開正位
鸞旌雞戟方慶脩齡豈謂豐屬黃離禍生蒼震宣猷庭內
秋冬之學空存博望苑中監撫之儀莫覩伏惟皇帝陛下
悼深伊將念切瑤山嗟上賓之不留惜外陽而無驗青宮
掩涕元圃酸心臣限守邊隅久違京闕不獲奔走奉慰闕
庭無任悲咽惶慕之至

代僕射濮陽公遺表

臣某言臣聞螻蟻知雨雖通感于元天蒲柳望秋必凋華
于厚夜况臣攝生寡要將命無方寒暑頓侵精神坐竭竈
乏傳薪之火餘焰幾何隙無留影之駒殘光卽盡叩心戀
闕忍死封章叫白日而不回望青天而永訣臣某中謝臣
雖忝望族本實將家自先臣出總郊圻遇大國靜無師旅
被服元化翹翔盛時遂與季弟參元俱以詞場就貢久而
不調因以上書自薦求通干時預試芸香作吏始筮仕于
德宗瑞節臨戎復分憂于陛下雖性分有限而忠誠不移
固無韓彭爲將之能實慕趙寶散財之義兩踰嶺嶠四建

牙旗約已潔身絕甘分少良田五頃慮莫及于子孫厚祿
萬鍾惠頗露于賓客恭承詔命以守藩條而掌事者徒以
元和中呂元膺留守東都李師道潛謀洛邑託以郡邸入
之甲兵臣當時爲元膺賓僚值師道竊發藍衫不脫竹簡
仍持因爲麾兵虜其元帥遂以將材相許戎統見期韻頎
遐途纂修舊服光陰荏苒授頻仍昨者分領許昌兼臨
河內當上黨阻兵之始是孽童拒詔之初臣方將奮勵疲
鶩指揮精銳所冀解鞍赤狄息駕晉城大攘蜂蠭之羣以
雪人神之憤自前月某日後軍聲大振賊勢少衰人一其

心士百其勇驚領有相曾無定遠之期馬革裹尸實負伏
波之願而精誠靡著志望見違援桴之意方堅就木之期
俄及忽自今月某日疾生腹臟弊及筋骸藥劑之攻擊愈
深神祇之禱祠無益固已騰名鬼錄收氣人寰復然無望
於死灰更起難同于仆樹然臣素窺長者曾慕達人省知
變化之端麤識死生之理豈其有貪富貴敢冀長延但以
未報國恩未誅賊黨視胄長免對弓莫彎思犬馬以自悲
悼鐘漏之先迫志有所在傷如之何撫節而乏淚可流伏
弢而無血可鉛臣某中謝其行營三軍已舉牒差某官某

河陽留務差某官某懷州留務差某官某訖並皆授之方
畧各有司存竊計旬日必無逗撓臣又伏思任司農大卿
之日授忠武統帥之時紫殿承恩彤庭入對躬瞻堯日親
沐舜風獲覩陛下神武之姿獲聞陛下憂勤之旨卽北藩
小寇東土微妖亦何足煩陛下之甲兵汚陛下之鉄鎗伏
願時推明畧光啟睿圖內則收德裕讓夷紳金之嘉謨外
則任彥佐元達宰汚之威力廓清華夏昭薦祖宗然後瘞
玉勒成鏤金垂烈臣雖百死復何恨焉臣精爽已虧言辭
失次氣無復續蒙以纊而莫勝口不能言飯用貝而何益

故國千里明君萬年永捐覆載之恩長入幽冥之路殘魂
不昧雖溫序之思歸枯骨有知遇杜回而必亢迴望昭代
哀號不能無任荒憤攀戀之至謹奉表代辭以聞

欽定全唐文卷七百七十二目錄

李商隱

二

爲榮陽公賀老人星見表

爲中丞榮陽公赴桂州至湖南勅書慰諭表

爲榮陽公至湖南賀聽政表

爲榮陽公桂州謝上表

爲榮陽公賀幽州破奚寇表

爲榮陽公奉慰積慶太后上謚表

爲令狐博士緒補闕綯謝宣祭表

爲柳州鄭郎中謝上表

爲懷州李中丞謝上表

爲湖南盧尹賀上尊號表

爲王侍御瓘謝宣弔并贈贊表

爲安平公謝端午賜物狀

爲大夫安平公華州進賀皇躬痊復物狀

爲安平公兗州奏杜勝等四人充判官狀

爲安平公赴兗海在道進賀端午馬狀

爲汝南公賀元日朝會上中書狀

爲侍郎汝南公華州謝加階狀

爲京兆公乞留瀘州刺史洗宗禮狀

爲濮陽公附送官告申使回狀

爲濮陽公奏臨涇平涼等鎮准式十月一日起燒

賊路野草狀

爲濮陽公涇原謝冬衣狀

爲濮陽公謝罰俸狀

爲濮陽公陳許舉人自代狀

爲濮陽公陳許奏韓琮等四人充判官狀

爲榮陽公桂州舉人自代狀

爲榮陽公謝除盧副使等官狀

爲榮陽公舉王克明等充縣令主簿狀

爲榮陽公論安南行營將士月糧狀

爲榮陽公奏請不敘錄將士狀

欽定全唐文卷七百七十二

李商隱

二

爲滎陽公賀老人星見表

臣某言臣得本道進奏院狀報司天監李景亮奏八月六日寅時老人星見於南極其色黃明潤大者聖惟合德神實效祥必垂有爛之文以表無疆之祚臣某中賀臣聞元象示人昊穹凝命曜爲經而宿爲緯則有常名斗挹酒而牛服箱或標虛號未若候時而出有道則彰居五福之先在三辰之列伏惟皇帝陛下昭明老契游泳莊寰式是中

秋呈茲上瑞况見於午位又屬寅時仰考元符乃有深意
自南耀彩將宏解愠之心近曉流光欲助無私之日皇心
載裕靈鑒孔昭况居率土之濱皆慶後天之壽臣謨蒙重
寄實遠清光送元鸞於梁間傷時自切望白榆於天上厥
路無由賀聖戀恩無任蹈舞屏營之至

爲中丞滎陽公赴桂州至湖南勅書慰諭表

臣某言今月八日宣告使某官某至湖南觀察府賚賜臣
勅書一通并慰諭臣所部將吏僧道耆老等乾文昭錫兌
澤旁流雖聞訃以銜哀亦感恩而竊忭臣某中謝臣伏聞

積慶太后爰初遘疾皇帝陛下卽不視朝慮切宸襟時連
暉暑載想大庭之養實懸萬國之心乃運屬歸真書留具
位陛下又能咨宰輔酌中之請稟聖賢推遠之懷始率義
以致憂終據經而順變獲情理兼修之旨成古今莫易之
文伏讀綸言實榮藩守伏以時逢積水行滯長沙擁阜蓋
而久留載青旌而莫濟未獲宣傳童艾號召蠻夷謹具當
時宣示所將兵吏及迎候將校訖唯冀下車已後食藥自
規仰憑垂露之文龐守宣風之職臣與將吏等無任感恩
望闕屏營之至

爲滎陽公至湖南賀聽政表

臣某言臣得本道進奏院狀報月日宰臣某等懇惄上言
請從聽斷特降優旨俯賜依從普天率土莫不慶幸臣某
中謝臣聞道唯應變合變則道昭禮貴酌情踰情則禮廢
苟非至德曷取大中伏惟皇帝陛下孝德兼躋聖猷允塞
日兄稟義邱梗延恩始自爽和遂停庶政絕臣僚之陛見
奉藥膳於宮朝及真宅言歸寢園將祔喪紀旣聞於約禮
克奉已布於成規遵大臣陳義之方得王者自家之化臣
方叨廉問猶在道塗雖清攬轡之心且阻執圭之覲湘波

附奏嶺嶠含誠敢思璵闈之前榮實慕金闈之舊籍無任
望闕瞻天結戀屏營之至

爲滎陽公桂州謝上表

臣某言臣奉違禁掖祇役遐陬雖懸就日之誠懼曠宣風
之寄柔轡載揚於永路輕舠利濟於大川卽以今月九日
到任上訖臣某中謝臣系承儒訓生屬昌期初掛弁髦卽
親筐篋嘉樹無忘於封殖青氊不落於寇偷再擢詞科一
登冊府徂遷歲律浮泛軍裝忽彩華纓俄列通籍極望郎
於南省備給事於左曹中間帖掌臺綱分修國史旋值孽

童拒詔狂虜亂華副中憲以急宣佐維城而遙護督晉氏
遷延之役絕戎人偵邏之姦敢伐善以攘渝固盡誠於養
棟伏惟皇帝陛下武推時夏文號欽明方將虔奉紫泥恭
拜青瑣豈意遽分專席叨賜再麾首南服以稱藩控西原
而遏寇褰帷廉部猶恐墜於斯文橫槊令軍實致憂於不
武雖期竭力終懼敗官況俗雜華夷地兼縣道文身椎髻
漸尉佗南越之餘叩鼓鳴鐘傳士燮交州之態網疎則魚
漏繩急則麁驚欲經緯以合宜顧韋弦而匪易伏願陛下
務修儉德廣扇廉風拾翠採珠不勤異物驅犀逐象用示

深仁始於問俗之時便獲稱君之美臣亦當求規水鼈取
戒脂膏冀少息於羣黎庶免拘於司敗三梁路阻九嶠山
遙浮江遇楚澤之萍望國隔番禺之桂遐思自鳥鎮颺音
於周圍之中遠羨仙莫永固本於堯階之上無任感恩望
闕結戀屏營之至

爲滎陽公賀幽州破奚寇表

臣某言臣得本道進奏官某狀報某月日幽州節度使張
仲武奏破奚部落及諸山奚除舊奚王匿舍朗所管外
殺戮首領丁壯老幼并殺戮羊牛焚燒車帳器械等計二

十萬刺史已下面皮一百具耳二百隻奚車五百乘羊一
萬口牛一千五百頭者天聲遠疊廟畧遐宣白虜獲于寧
臺赤夷浮於燕路臣某中賀臣竊窺舊史逖聽前朝有天
子憂邊清宵輶寐將軍出塞白首言歸至乃或勝或奔一
彼一此竟困塞郊之柝那停絕漠之烽猶欲敘烈旅常告
功祧廟用其贊勝謂曰難能况幽朔巨都全燕重地薦臻
奚寇猾亂華人田豫之護鮮卑莫能深入祭彤之軍遼水
惟遣相攻近歲以來爲患滋甚走單于偵邏之路懷駒支
漏泄之姦張仲武重感國恩習知邊事同三師而肄楚侔

五餌以間戎乘其囂惰之時俄得翦除之便燕犀密掛冀
馬潛羈超距投石者動過千羣戟手科頭者畧踰萬計坎
三鼓而河流自却聲六校而屋瓦皆飛自是鴟懼喪林兔
忙迷穴無舟掬指有地僵尸未驚紫陌之烏前軍已蹙不
喚淮山之鶴後隊仍窮遂分袁尚之頭顱仍裂蚩尤之肩
髀穹廬落燼同甲揚灰山積雲屯大收其車乘角羸耳濕
盡獲其牛羊柳水載澄桑河無事爰施吉語入解皇威此
皆皇帝陛下功格上元運膺下武授茲成算於彼當仁震
肅九圍歡呼萬國昔艱難云始胡塵首起於盧龍今開泰

有期漢將先清於涿鹿人謀允若靈貺昭然固已上慶祖宗下光編策錄圖洪範競三古之殊尤玉檢金泥有百神之靈祐臣雖當防遏不介邊陲空增氣於懦夫實叨榮於下將日闔千里天蓋九重奉一月之捷書唯知抃蹈獻萬年之壽酒尚隔班行念風水於遐藩寄夢寐於宣室無任望闕結戀之至

爲滎陽公奉慰積慶太后上謚表

臣某言臣得禮部牒奉六月二日勅大行積慶太后冊上尊號曰貞獻皇后者慶屬堯門謚遵周道免置考義璽館

流輝臣某中謝臣聞刑于寡妻文王之令德怨及邱梗漢后之深非詩傳所存褒貶斯在伏惟皇帝陛下用周典訓滌漢瑕疵報皇后友愛之仁如文宗引進之念積慶太后始蒙敬養終受崇名掩沙麓以傳祥輶河洲而抒美天長地久式崇清廟之尊彝萬歲千秋永慰光陵之牀帳天下臣子不勝感抃限以守藩江嶺不獲奉慰闕庭無任惶恐屏營之至

爲令狐博士緒補闕綯謝宣祭表

草土臣某言今月某日中使某至奉宣恩旨致祭臣亡父

贈司空臣某者存沒願終哀榮禮備荒迷觸地號叫瞻天
臣某中謝臣先臣某生遇昌期早司國柄沒留懿德上惻
宸襟特降王人迂臨私第陳其醜爵潔之豆登招遺魂於
幽陰旋歸莫暗視殘生於晷刻報效無期臣等無任戴恩
荒殞之至謹附中使某奉表陳謝以聞

爲柳州鄭郎中謝上表

臣某言臣伏奉某月日制書授臣某官者卽以今月日到
任上訖臣某中謝臣緒承舊族師事通儒萬里成功雖無
壯志九夷不陋庶慕前蹤二紀蠻陬三提郡印唯貞苦節

以奉休辰牙管一雙未嘗闕慮竹書兼兩何敢經懷渭水
之陰敝廬斯托每還初服常慷慨農今者又卽殊方復臨
雜俗固蒙聲教終遠文明謹當宣舉詔書撫安縣道媒官
學舍畢納於人倫畜蠱帶牛盡移於地利至於因遐弄法
挾遠生情縱漏嚴科必貽陰責山兼象縣江帶龍城撫已
跼天敢忘元造舉頭見日何處皇居憑宵夢以銜誠託歸
飛而結懇無任瞻天戀闕之至

爲懷州李中丞謝上表

臣某言臣伏奉某月日制書授臣某官者天旨下臨星言

東鴦卽以今月某日到任上訖臣某中謝臣聞漢分刺舉之條三河最重唐制郊圻之數二宅惟均况蘇公舊田懷侯故邑太行會險德水通津在申晝之時素爲清地語翕張之勢號曰要區自河上置軍以幕中分理地雖密邇事異躬親伏惟神聖文武至仁大孝皇帝陛下神以運機聖而制變將鎮頑梗更務恢張由是開三壘之新規復數朝之故事齊壇將節重加廉郡之雄阜蓋朱幡各有爲州之貴遙徵三紀間有兩人陶某以吏理當財鄭某以名家正授清塵不遠餘烈猶存頒條之寄繼組爲難若臣者品以

勲昇官由賞達徒慕益恭之美以承猶宥之恩過獎在朝
承乏充使將聖代懷柔之德率昆夷畏慕之心萬里以遙
三時而復副介不離於痼疾故人免嘆於凋零敢矜跋涉
之勞自被生成之賜豈謂皇帝陛下謂能專對遽委牧人
仍其栢署之雄賜以竹符之重遂使霍氏固辭之第早建
雙旌于公必大之門更屯五馬賢無所象分可自量入祖
廟而歛驚瞻父堂而益懼况潞潛逆孽許出全師繫此州
兵橫制賊境兼聲勢之任有資扉之頒謹當懋舉詔書聽
求人瘼思理行之第一誠媿昔賢奉忠孝於在三亦惟先

訓苟憊素誓則有神明伏遠雲天已逾旬朔獻封人富壽
之祝未卜其時懸子牟江海之思莫知其極無任感恩攀
戀闕庭之至

爲河南盧尹賀上尊號表

臣某言臣得本道進奏院狀知宰臣某等奉上尊號以光
洪休耀列聖之睿圖表三宮之義訓凡在生物孰不歡心
臣某中賀臣聞善言天者必推功於廣覆善言日者必詠
德於大明然後物仰元穹人知景曜皇王擬象今古同規
伏惟仁聖文武章天成功神德明道大孝皇帝陛下體天

垂蔭法日流輝宏上德以纘戎啟下武而膺運頃從臨御
旋致治平雨塊風條時推順適苗螟葉蟻坐致銷亡是以
銀甕石碑非煙浪井神而告瑞史不絕書且獯鬻爲災周
秦乏策金行火運不絕於侵陵瀚海陰山幾渝於約誓而
敢乘衰運來犯昌朝陛下乃赫以天威授之宏畧一伐而
單于僅免三鼓而貴主來還滅大邦之仇讐攢累聖之忿
憤及晉陽逐帥代馬新羈陛下又濬發宸襟委諸廟畫浹
辰而前軍就路踰月而元惡膏砧靜豐沛之遺疆舉陶唐
之故俗蕞爾潞子復生孽童脫縗冀恩上枢拒詔據九折

之險有五州之人藪澤逋逃冀土租稅陛下又遠揚神斷
深詔徂征合鎮魏之強藩出韓彭之銳將夷其巢窟去彼
根株清明皇之舊宮復金橋之故地曾非曠歲集此不功
固已至化潛融事光于玉版元機獨運理溢于瑤編况又
志切希夷道存沖漠慕遺踪于姑射載動堯心思順請于
崆峒欲勞軒拜遠揚聖祖載佇神孫俾異法皆祐多門就
掩麟殿正元元之座鳳書招黃老之徒將以休有萬齡臨
茲兆衆使咸踐壽昌之城俱游富庶之鄉巍乎煥乎盛矣
美矣故得人祇協欲華夏均懷願加尊顯之稱以報財成

之美宰臣等果能陳大義允建鴻名伊尹暨湯咸有一德
咎繇謨禹克纘九功述盡善於王猷標具美於帝籙南山
稱壽北辰降光永終無極之年長奉上清之號臣幸丁昌
運方守洛京空深戀闕之誠不在稱觴之列舉頭見日雖
悲千里之遙側管窺天且慶百年之幸無任徘徊望闕蹈
舞踴躍之至

爲王侍御瓘謝宣弔并賻贈表

草土臣瓘言今月某日某官呂述某官任疇等至奉將聖
旨以臣父某官某亡歿賜弔臣等并賻贈臣亡父布帛三

百匹米粟三百石者大夜衝輝窮泉漏澤以隕以越終哀
且榮臣某中謝臣先臣某託體元侯榮名任子象賢傳劖
餘力攻書歷七廟而在公秉二道而非墜一祚氣與赤狄
兵聚晉城先臣受律臨戎忘家徇衆士卒均食罔愧于前
修廊廡散金遠齊乎舊說上憑玉畧下振軍威旬月之間
慶捷相繼並親梓三鼓躬運九章如臣弟兄皆冒矢石豈
意竒功垂立大願莫從傳食失時略血成疾奄至凋落長
違盛明此皆由臣等抱釁既深就養無素遂延家難仰惻
宸襟止偷生于晷刻亦何顏於天地伏惟皇帝陛下悼深

撫几悲軫聞輶降憫惻於上公厚贈禮於遺體昔魏優死事止分食邑之餘漢養孤兒但有羽林之聚方於今日惟媿推恩叫號失容戴履無所軍前結草必自於幽靈石上澆松敢忘於遺訓無任感恩荒殞之至

爲安平公謝端午賜物狀

右今月某日中使某至奉宣恩旨賜臣手詔一通兼前件端午紫衣銀器百索并大將衣者乾文昭融睿賜稠疊恩生望外榮積懼中臣已當時宣布給散訖伏以正陽令月端午佳辰渥澤合止於勲賢錫賚宜先於戚屬臣遠臨東

魯久去上京豈望仁時同躋壽域入行明詔伏讀而不啻
千鈞一襲輕衣跪捧而若無三伏况又綵縷出仙蠶之璽
貞金凝姹女之魂持可戒盈帶堪延算豈微臣獨忝在列
校不遺華楚成行永願千春而奉聖縣長共保常期五日
以霑恩臣與大將等無任感激懇惓之至

爲大夫安平公華州進賀皇躬痊復物狀

右臣聞藩方舊德臣子私懷將稱慶於天朝必展儀于土
貢伏惟皇帝陛下道苞乾象德總坤靈肇自元正載康福
履九廟不忘于繼志兩宮無闕于問安鼓舞萬靈波濤四

國驗推測則咸如周卜聽祝辭而皆若華封臣坐擁伏熊
行驅畫隼值一人之有慶當春日之載陽心但葵傾跡猶
匏繫伏蒲之覲謁未果獻芹之誠懇空深況又地邇宸居
俗薰儉德更無玉帛以率梯航前件石器等瑞匪土硎珍
慚羸磬並取諸地產皆勒以工名茯苓茯神等品載仙經
奇標藥錄通靈祛疾不惟色若凝脂延壽安神豈是心如
枯木千霄陳進無任兢惶云云

爲安平公兗州奏杜勝等四人充判官狀

杜勝

右件官流慶相門策名詞苑當仁罕讓見義敢爲符彩極高涯涘難挹臣前任已奏爲判官臨事而每見公方與語而每相宏益今臣寄分團結任切訓齊將奉廟謨實在賓彥伏請賜守本官充臣團練判官

趙晳

右件官洛下名生山東茂族仁實堪富天爵極高妙選文場亟仕侯國珪璋特達蘭杜芬馨今臣廉問大藩澄清列部藉其謨畫共讚朝經伏請賜守本官充臣觀察判官

李藩

右件官文圓馳聲賓階擅美口含言瑞身出禮門前任已
奏爲判官馭下而和易不流臨事而貞方有執今臣移參
國用務切軍需實假平均以同計畫伏請賜守本官充臣
觀察支使

盧涇

右件官博涉典經該核流畧自魯壁所壞汲冢之藏三篋
能知五車盡究加之文采兼以器能前者爲臣屬寮常在
州推獄明斷而不容吏點哀矜而莫有人冤今者團練之
司稽巡是切直思獎效非敢用情伏請依資賜授法官充

臣部團練巡官

以前件狀如前伏以長人者必以吏分勞逸開幕者亦用士爲輕重若不樹人何以報國况臣素無勳效謬竊寵榮至於賢才敢恥筐篚前件官並推賓彥堪贊藩條伏希殊私盡允誠請謹錄奏聞伏聽敕旨

爲安平公赴充海在道進賀端午馬狀

右臣伏以浴蘭令節採艾嘉辰百辟合祝於堯年萬方宜修於禹貢臣方夙駕之部馳傳出關欲獻琛而未識土宜願祝壽而已悲日遠前件馬伏櫪斯久著鞭亦多麤覺柔

馴未嘗奔逸雖非龍孫驥子邈一舉以絕塵願陪月駟雲
螭慶千嘶於扈蹕千冒宸宸無任兢惕之至

爲汝南公賀元日朝會上中書狀

右得本道進奏院狀報今月日皇帝御宣政殿受冊尊號
爲仁聖文武至神大孝皇帝禮畢御丹鳳樓大赦天下者
當時集軍州官吏等丁寧宣示訖鴻名有赫慶澤無偏上
光宗廟之明靈下慰蒸黎之欽屬功勞必表邇負咸蠲出
縲繫於狴牢復流竄於魑魅撫安鰥寡存省耄期有國之
闕政咸修前代之遺文必舉此皆相公富皋夔之事業秉

伊說之材謀協贊神功導宣睿化符瑞沓至天人允咸慶雲非煙浪井不鑿然後率多士陳大儀致君於堯舜之前驅俗於勛軒之上四維仰化萬國承流况某忝典州兵嘗聞廟算雖阻陪班列亦遠接歡呼鳳闕雙標應開天上雞竿百尺想在日邊顧奮飛而不能亦攀望而何及無任抃躍之至

爲侍郎汝南公華州謝加階狀

右臣伏奉今月某日制書加賜臣階朝散大夫者榮從日下恩自天中臣聞周室設官實重大夫之號漢臣異禮則

加朝請之名若臣者辨乏談天文非擲地貪叨華顯縣歷
光陰當陛下御極之初分陛下憂人之寄金章紫綬已塵
求瘼之榮崇級清階更切昇高之望循揣斯久怔忪莫寧
惟當勤奉詔條所希麤贖官謗誠深感勵情切違離犬戀
主而空深齧負山而何力無任感恩望闕結戀屏營之至
爲京兆公乞留瀘州刺史洗宗禮狀

臣得當管瀘州官吏百姓李繼等及瀘州所管五縣百姓
張思忠等并羈縻州土刺史韋文賞等狀稱前件官到任
已來勵精爲理多方以蘇疲病况郡連戎僰地接巴黔作

業多仰於茗茶務本不同於秀麥宗禮闕十
二字猶之邦麤識
困倉之積伏冀宸嚴俯哀縣道特許量留宗禮更一二年

爲濮陽公附送官告申使回狀

右今月某日中使某至奉宣恩旨賜臣前件勅書手詔官
告者已准詔旨示軍吏僧道耆老等其官告已差押衙某
奉表陳讓訖臣才謝適時知非周物承私門有後之慶當
大朝猶宥之恩頡頏漸高騰凌必遠雕蟲可恥揚子雲不
以爲文跨馬莫能杜元凱于何稱武遂叨旗鼓及建麾幢
南犯瘴烟遠提龍戶西當燿火密控犬戎臨長萬人董齊

千乘可以專殺未嘗負租況又榮假冬卿顯分霜憲軍前
列秦時御史幕下辟漢日郎官碧落仰瞻已參星象丹霄
迴望了別塵泥滿盈之戒是虞富貴之願斯足而九國未
至六戎尚存闕懸藁街阻作飲器礙白環之貢獻隔青鳥
之神仙聞軍實而皆裂兵符視戰格而髮衝武弁苟拘司
敗已漏嚴科豈可授列五兵任兼八座詔開垂露降自天
家中使飛星來從日域紫泥猶濕黃紙未乾宣傳而誰則
懦夫感激而孰非死士固不合更稽成命重曠殊恩竊以
君人者在度材而命官臣下者宜論功而受賞易憂且乘

詩戒斯亡上斂彝倫下招顛隕實關國柄非止臣身是敢
輒黷冕旒亟陳章疏言之必可顧孫寧忘於書紳汗出而
收漢祖何妨於銷印伏惟皇帝陛下深迴睿鑒曲被鴻慈
從國僑讓邑之言獎成季辭卿之志俾無賞凝僭以激當
官倘麤得揚威稍能陳力恢復河右收禹貢之地圖蕩定
隴西雪皇唐之祖業則亦不敢更辭竹帛復拒鼎彝明神
所知丹慊具在臣不勝感恩陳乞悃款屏營之至

爲濮陽公奏臨涇平涼等鎮准式十月一日起燒

賊路野草狀

右臣當道最近寇戎實多蹊隧每當寒凍須有隄防今纔畢秋收未甚霜降井泉不合草木猶滋雖已及時未宜縱火臣已散帖諸鎮訖候皆黃落卽議焚除稍越舊規不敢不奏謹錄狀奏

爲濮陽公涇原謝冬衣狀

右某月日中使某至奉宣聖旨賜臣及大將兼諸鎮防秋兵馬等前件敕書手詔并冬衣者臣並已准詔旨宣示給散訖恩極解衣榮加降璽戴山未重負日非暄臣謬領藩垣適當戎狄唯憑廟算麤振軍威絕漠獵迴幸無警急高

烽火過但報平安直以地勢多陰川形稍背三伏常聞於
屏簾九秋尋訢於垂縉代馬嘶嘶隴山無葉燕鴻未過涇
水先冰是以每降王臣仍迂御筆緘封垂露寵錫禦冬非
玉女裁成卽仙人織出徒驚在筭莫匪因鍼始顧孱微深
懼不勝冠帶旋蒙被服便如能執干戈遍逮軍前厯霑麾
下達喜氣而陳根復秀動歡聲而蟄戶潛開華楚成行曳
婁塞路其山南宣歙三道大將等雖久居炎燠不憚嚴凝
亦旣更衣皆忘易地賈餘勇而例思盡敵感鴻私而咸願
殺身各限征行不獲陳謝臣與大將等無任瞻天戀闕感

恩屏營之至

爲濮陽公謝罰俸狀

右臣伏准御史臺牒奉恩旨以臣不先覺察妖賊賀蘭進
興等宜罰兩月俸料者伏以霧市微妖潢池小寇有乘先
覺上黷宸聰昔漢以捕盜不嚴猶加黜削晉以發姦無狀
亦峻科條豈若皇帝陛下恩極好生德惟宥過與其漏網
止以罰金臣與寮屬等無任戴恩宥罪屏營之至

爲濮陽公陳許舉人自代狀

某官崔蠡

右臣伏准某年月日敕內外文武上後三日舉一人自代者臣伏見前件官欒郤舊族鄒魯名儒鏡納無私山高不讓而又循牆戒切銘座規深蘭省辭榮竹符出守漢悲來暮晉有去思晦而轉彰冕而尤白旣還綸閣復掌禮闈人驚吞鳳之才士切登龍之望及司版籍以副地官比按西羌孤忠靡失居然國器實映朝倫今沔水無兵武昌非險用爲廉問尚鬱廟謀臣所部乃秦韓戰代之鄉周鄭交圻之邑軍踰千乘地控三州若以代臣必爲名將敢希睿澤曲遂愚衷俾寬竊位之譏冀獲進賢之賞干冒陳薦無任

兢越謹錄奏聞伏聽勅旨

爲濮陽公陳許奏韓琮等四人充判官狀

韓琮

右件官早中殊科榮推雅度弦柔以直濟伏而清頃佐憲臺且丁家難當喪而齒未嘗見旣祥而琴不成聲逮此變除未蒙抽擢臣頃居鎮守琮已列賓僚謀之旣臧剛亦不吐願稽中選榮借外藩伏請依資賜授憲官充臣節度判官

段環

右件官言思無邪學就有道屢爲從事常佐正人加以富
有文辭精於草隸儻而且檢通亦不流臣所部稍遠京都
每繁章奏敢茲上請乞以自隨伏請依資賜授憲官充臣
節度掌書記

裴邈

右件官魯國名儒晝鄉右族松寒更翠馬老不迷臣昔忝
鑿門辟爲記室屬辭而宿構無異論兵而故校多歸委以
前籌見其餘地伏以前任大理評事已三十三箇月比於
流輩已是滯淹伏請特授憲官充臣觀察支使

夏侯瞳

右件官藏器於身爲仁由己齊莊難犯勁挺不搖臣任切
拊循務繁稽勾思留仙尉以重賓階伏請依資改授一官
充臣節度巡官

以前件狀如前臣四朝受任三鎮叨榮幕碣石之築宮廣
延儒雅效西河之擁籌樂得賢才韓琮等並無所因依不
由請託久諳才地堪列幕庭伏希殊私盡允誠請謹錄奏
聞伏聽敕旨

爲滎陽公桂州舉人自代狀

某官裴俅

右臣伏准某年某月日敕內外文武官上後舉一人自代者伏見前件官輩鄉茂族洛下名生處家國以必聞善兄弟而無渝而又南翬輝彩東箭含筠身先較藝之場首出觀光之籍從外府而允稱賢佐立中臺而克號清郎洎時急昌言官登大諫楊阜常規於法服陳羣盡削其封章實於不拂之朝能守勿欺之旨臣所部俗分蠻徼地控越城藉威畧以靖封隅資簡惠而安疲瘵願迴殊渥以授當仁豈微敬仲之才兼有伯游之長俯從牢讓克免曠官特冀

宸嚴曲垂矜許干冒陳請惶越無任

爲滎陽公謝除盧副使等官狀

新授某官盧戡 新授某官任繕

右臣得進奏官某狀報臣所奏盧某等二人奉某月日勅
旨賜授前件官充職者臣謬當廉印合啟幕庭撫魚罩以
興懷懼殺皮之廢禮盧戡與臣同年登第少口論交學富
文雄氣孤志逸玉清越而爲樂女舒脫以求媒實懷難進
之規不起後時之歎任繕幼學孝悌潔靜精微得君子之
時中友鄉人之善者匪因請託實自諳知皇帝陛下俯照

遠藩咸加命秩南臺貼職延閣分班使戡有紓朱之榮繕無衣白之見已經聖鑒可謂國華冀收規畫之功共奉澄清之寄不勝感恩荷聖之至

爲滎陽公舉王克明等充縣令主簿狀

以前件狀如前伏以臣所部控聯谿洞參錯蠻髦水接重湖山當五嶺縱有天官注擬多緣地理幽遐或不出上京已發徒勞之歎或顰來屬邑卽聞歸去之辭旣經久而不謀亦柔良而曷寄臣謬膺廉部慮在曠官儻旬朔以無言則賦輿而必闕前件官或膏梁遺胄或英俊下寮雖寓遐

限久從試吏假之銅墨有意於鳴琴委以簿書不羞其棲
棘旣聞績用合有甄昇一則復遠俗之凋殘一則輕微臣
之憂責苟事因請託跡涉貪殘將有負於斯人豈敢逃於
舉主伏希卑聽咸賜卽真干冒宸嚴無任兢越

爲榮陽公論安南行營將士月糧狀

使當道先准詔發遣行安南行營將士五百人其月糧錢
米並當道自般運供送者右臣當道繫勅額兵數只一千
五百人內一千人散於西原防遏三百人狃在邕管行營
入界內分捉津橋專知鎮戍計其抽用畧無孑遺至於堅

守城池備禦倉庫供丞職掌傳遞文書並是當使方圓衣糧招收驅使其安南行營將士皆是勅額外人又當管去安南三千餘里去年五月十五日發遣八月二十日至海門遭惡風漂溺官健一十三人沉失器械一千五百餘事其年十二月六日差綱某等般送醬菜錢米今年五月八日至烏雷又遭颶風打損船三隻沉失米五百餘石見錢九百五十石至今姜士贊等尚未報到安南臣到任已來爲日雖淺懸軍在遠經費爲虞竊檢尋見在行營將士

等從去年六月已後至今年六月已前從發赴安南用夫
船程糧及船米賞設并每月醬菜等一年約用錢六千二
百六十餘貫米麪等七千四百三十餘石大數雖破上供
餘用悉資當府不唯褊匱且以遐遙有搬灘過海之勞多
巨浪颶風之患須資便信動失程期臣忝守戎行不勝憂
結伏以裴元裕旣開邊隙又乏武經抽三道之見兵備一
方之致寇曾無戎捷徒曜軍容昔者淮陰驅市井之人尚
能破敵晉伯假紀綱之僕亦不常留苟元裕能均食散金
絕甘分少便可收功於故校豈資別立於新家側聞容廣

守臣亦欲飛章上請臣緣乍到未敢抗論已牒韋厪李玭
并牒元裕請詳物理續具奏聞伏惟皇帝陛下道邁羲助
盛加華夏南蠻以茲脆弱宜慕聲猷伏乞特詔元裕使廣
布仁聲遠揚朝旨無邀功以生事勿耗國以進兵庶令此
境之人無擁思鄉之念唯茲裁照實屬皇明今前綱姜士
贊等沉失至多遲留未達復須遣使以續見糧雖欲無言
懼不集事儻未蒙恩允特賜抽還則長慶二年安南有奏
請借便當軍糧米五千石經畧使王承業請一二年内勸
課輸填頗有文符並未支送伏乞天恩憫其州鄉闕乏哀

以海路漂渝且新疑安南併還欠米庶行營將士等得存
宿飽無乏晨炊臣所守藩方粗獲通濟謹錄奏聞伏聽勅
旨

爲滎陽公奏請不敘錄將士狀

使當道將士及管內昭賀等州軍士共二千一百二十六人準去年五月五日制敘勲階使司去今年四月二十五日具將士姓名及甲授年月日申省訖右臣當道將士等遠當戎寄式控遐陬乘解愠之和寧親矢石望拱辰之列實隔煙波近者朝廷奄靖北方惟荒東道當陰山之哭虜

靡效織埃及天井之摧凶不橫寸草徒以皇帝陛下非煙
結彩瀼露流光向明纔及於鳳樓布澤遠霑於蠻徼固合
同成國慶共稟朝榮伏以當管近無豐年亦經小水海上
有分屯之卒邕南有未返之師歉冗食於居人困裏糧於
戎士臣初叨廉問方切拊循雖拾綴升階各思受寵而濡
毫執簡無以爲資仰慮後期敢忘積懼伏見比者諸道有
物力未足者聖恩洪貸許且權未敘錄竊緣往例冒此上
陳伏冀天慈曲垂矜許臣與將士等無任感激冒昧戰越
之至